



# NEDERDUITSE GEREFORMEERDE KERK AMPTENARE PENSIOENFONDS

'n Deelnemende Fonds in die Sanlam Sambreelfonds

## PENSIOENE OMSENDSKRYWE 1 VAN 2019

**Aan: ALLE WERKGEWERS EN LEDE VAN DIE AMPTENARE  
PENSIOENFONDS**

### VERHOOGDE STERFTEVOORDELE

Sedert die stigting van die Amptenare Pensioenfonds in 1984, het die voordele wat die Fonds bied, met enkele wysigings, dieselfde gebly. Een van die voordele wat nie verander het nie, is die sterftevoordele.

Die Bestuurskomitee van die Amptenare Pensioenfonds het in 2018 besluit om hierdie sterftevoordele te hersien sodat dit in pas is met ander pensioenfondse en sodat families van afgestorwe lede groter baat sal vind by die voordele wat betaalbaar is. Met die hersiening was die Bestuurskomitee sensitief vir kosteverhogings en was vasberade om enige verhoging tot 'n minimum te beperk.

In Augustus van 2018 het die Bestuurskomitee besluit om die sterftevoordele soos volg aan te pas miv 1 Maart 2019:

1. Die sterftevoordele binne die Fonds word verhoog van twee maal jaarlikse salaris na drie maal jaarlikse salaris.
  2. Die sterftevoordele buite die Fonds word verhoog van 1 maal jaarlikse salaris na twee maal jaarlikse salaris.
- Die gadeversekering bly dieselfde, naamlik een maal jaarlikse salaris.
  - Die ongeskiktheidsenkelbedrag bly dieselfde, naamlik een maal jaarlikse salaris.
  - Die ongeskiktheidsinkomste versekering bly dieselfde, naamlik 75% van salaris.

Gepaardgaande met hierdie hersiening, was daar die normale jaarlikse hersiening van premies gebaseer op die eiseskiedenis van die vorige jaar. Hieronder, opsommend, is die voordele en premies:

<b>Voordeel</b>	<b>Premies soos op 1 Maart 2018</b>	<b>Nuwe premies miv 1 Maart 2019 (Persentasie van pensioengewende salaris)</b>
<u>Verhoogde</u> Groeplewensversekering (begrotingsitem)	0,464%	0,908% Werkgewer betaal 50% en lid betaal 50%
Gadeversekering (begrotingsitem)	0,883%	0,972% Lid betaal ten volle
Enkelbedrag ongeskiktheid (begrotingsitem)	0,156%	0,156% Werkgewer betaal ten volle
Ongeskiktheidsinkomste (nie begrotingsitem nie)	0,831%	0,831%
<u>Verhoogde</u> Sterftevoordele binne die Fonds (nie begrotingsitem nie)	0,932%	1,384%

Waar daar 'n begrotingsitem aangedui word, beteken dit u moet die geld saam met die bydraes oorbetaal.

### MEDIESE BEWYSVRYE LIMIETE

Omdat van die sterftevoordele verhoog het, het van die mediese bewysvrye limiete ook verhoog. Hierdie limiete bepaal die vlak van dekking waarvoor lede kwalifiseer sonder om mediese bewys van gesondheid (versekerbaarheid) te ondergaan.

Tipe versekering	Bestaande limiet	Nuwe limiet
Lewensversekering	R3 600 000	R5 400 000
Enkelbedrag ongeskiktheid	R1 200 000	R2 160 000
Gadeversekering	R1 200 000	R1 200 000
Ongeskiktheid inkomsteversekering	R65 000	R65 000

### Bydraekategorieë vanaf 1 Maart 2019 vir werkgewers en werknemers (bly onveranderd):

	Bydraekategorie					
	1	2	3	4	5	6
<b>Werknemer-bydrae</b>	Gesluit	7,5%	5%	7,5%	7,5%	7,5%
<b>Werkgever-bydrae</b>	Gesluit	13%	8,5%	15%	17,5%	20%
<b>Totale bydrae</b>	Gesluit	20,5%	13,5%	22,5%	25%	27,5%

**LET ASSEBLIEF DAAROP** dat al die maandelikse bydraes en/of premies agteruit betaalbaar is, dit wil sê die verhoogde bydraes en/of premies is betaalbaar einde Maart, geldig vanaf 1 Maart. Dit is baie belangrik om daarop te let dat die bydraes laastens teen die 7de van die maand wat volg op die maand waarvoor die premies betaalbaar is, inbetaal moet wees. Die Pensioenfondswet vereis dit. Indien dit na die datum inbetaal word, sal daar rente op die laat betaling van die bydraes gehef word teen 'n rentekoers soos bepaal deur die Wet.

Alle lede het die keuse om miv 1 Maart 2019 hul pakkette te struktureer, gegewe enige verhogings toegestaan deur die werkgewer. Bydraekategorie verhogings (of verlagings), kan slegs in Maart van elke jaar gedoen word.

### Die Fonds se operasionele koste

Omdat hierdie kantoor baie navrae kry oor die administrasie, konsultasie en ander kostes verbonde aan die bedryf van die Fonds (soos dit op die *retirementfundweb* beskikbaar is) gee ek graag hierdie koste ook aan u. Hierdie kostes word volgens wet van die werkgewer se bydraes afgetrek en sal u merk dat hier geen verhogings is nie. (Hierdie is nie 'n begrotingsitem nie):

Komponent	Premie/koste vir 2018	Premie/koste vir 2019
Sanlam Administrasie	0,3934%	0,3934%
Konsultasie	0,2219%	0,2219%
Gebeurlikheidsreserwe rekening heffing ("CRA levy")	R3,00 per lid per maand	R3,00 per lid per maand

Daar is ook 'n koste aan die beleggingsbestuur verbonde. Hierdie verhoging beloop 0,01% per jaar van die markwaarde van bates en word afgetrek van die opbrengs op die bates. Beleggingsopbrengs word netto van koste aangedui.

## **Begrafnisskema: Sanlam Sky**

Die begrafnisskema se premies en dekkingsbedrae bly dieselfde vir 2019. Dit is soos volg:

**Opsie 1:** R11,20 per maand met R10 000 dekking vir hooflid en gade en dekking vir kinders soos omskryf (dekking staak by aftrede)

**Opsie 2:** R20,00 per maand met R10 000 dekking vir hooflid en gade en dekking vir kinders soos omskryf (dekking gaan voort na aftrede)

**Aanvulling** van dekking: R18,00 per maand vir 'n addisionele R5 000,00 dekking

## **Korrektheid van data en begunstigde benoemingsvorms**

Werkgewers by gemeentes/instansies wat gelas is met die oorbetalings van maandelikse bydraes en premies op die web, moet asseblief verseker dat hul lede se persoonlike besonderhede op die web korrek is aangesien hulle by magte is om dit te verander. Dit is krities belangrik dat lede se selfoonnommers en e-posadresse op die web aangebring word aangesien dit in die toekoms 'n belangrike manier gaan wees om elektronies, direk met lede te kommunikeer. Daar kan ook miv Oktober 2018, begunstigde benoemingsvorms direk op die web gelaai word, maar dan moet die lid self dit doen nadat hy/sy op die web geregistreer is. Dit sou tog raadsaam wees om steeds 'n harde kopie van hierdie vorm by u kantoor op lêr te hou. (Indien u navrae oor die web het, skakel gerus die webspan by 0861 223 646).

## **Beleggingsopbrengs**

Lede wat reeds op die web geregistreer is en hul fondswaardes noukeurig dophou, sou in baie gevalle met teleurstelling gemerk het dat hul fondswaardes, ten spyte van goeie bydraes, nie na wense presteer het nie. Die *Accumulation Portfolio* waarin die meeste lede wat onder 60 is belê is, het byvoorbeeld vir 'n twaalf maande tydperk tot einde November 2018, 'n baie swak -7,8% presteer.

Lede wat egter nader aan aftrede is en in die meer konserwatiewe portefeulje belê is, is gelukkig beter daaraan toe. Die *Lifestage Capital Protection Preservation Portfolio* het byvoorbeeld 'n uitstekende 8,1% vir die twaalf maande tot einde November 2018 presteer.

Jonger lede se fondswaardes het dus verminder terwyl ouer lede se kapitaal beskerm was en steeds groei gekry het. Gelukkig het jonger lede 'n langer beleggingshorison en kan beslis weer opmaak vir die verliese as markte positief draai.

Die Bestuurskomitee van die Amptenare Pensioenfonds is steeds gemaklik dat die lewensiklusmodel van beleggings die beste uitkomst vir lede op die langer termyn bied. Ons vertrou dat 2019 'n beter jaar vir beleggingsopbrengste sal wees. (Die Desember 2018 data was nie beskikbaar met die opstel van hierdie skrywe nie).

## **Die Kantoor**

Let asseblief daarop dat die pensioenfondskantoor gehuisves word by die Algemene Sinode se kantore te Hatfield, Pretoria. Mnr Theo Smith beman die kantoor en is steeds beskikbaar vir alle navrae rakende die pensioenfonds.

Vriendelike groete

(Geteken)

**TP SMITH**

**KANTOORBESTUURDER**